

Izjava OHR-a na konferenciji za medije međunarodnih organizacija

Politički sporazum o reformi policije već postoji

Ministar vanjskih poslova Bosne i Hercegovine, Mladen Ivanić i premijer Republike Srpske, Milorad Dodik su nedavno govorili o postojanju potrebe za započinjanjem novih političkih pregovora o reformi policije.

Takvi pregovori nisu potrebni.

Politički dogovor je već postignut u jesen prošle godine. Taj dogovor su podržali entitetski Parlamenti, kao i Parlament Bosne i Hercegovine. Ovim dogovorom su se strane obavezale na formiranje Direkcije za reformu policije. Vijeće ministara je nakon toga uspostavilo ovu Direkciju. U skladu s političkim dogovorom, Direkcija trenutno radi na tehničkim zadacima vezanim za izradu plana za implementaciju reforme policije.

Predstavnici Republike Srpske, kao i svi politički faktori u Bosni i Hercegovini, moraju biti svjesni činjenice da je Evropska unija podržala postignuti politički dogovor i odluku koju je kasnije donijelo Vijeće ministara BiH. Na tim osnovama Evropska unija je zatražila od Evropske komisije da započne pregovore o potpisivanju Sporazuma o stabilizaciji i pridruživanju kako bi na taj način započeo i zvanični proces integracije Bosne i Hercegovine u EU.

U političkom sporazumu se kaže da entiteti i država trebaju usvojiti plan koji izradi Direkcija. Dakle, iako će vlade i Parlamenti imati priliku da nakon izbora raspravljaju o izvještaju Direkcije, razgovaraće se isključivo o tom izvještaju i ni jednom drugom.

Republika Srpska ima tri mjeseca i šansu koja je ograničena na vrlo kratak vremenski period da u okviru Direkcije oblikuje proces policijske reforme. Ovo je od suštinskog značaja, s obzirom da neće biti nekog drugog tehničkog procesa u kojem će se to moći učiniti.

Ukoliko organi vlasti Republike Srpske zaista žele oblikovati reformu policije i njene rezultate te doći do uspješnog okončanja pregovora o stabilizaciji i pridruživanju kao i do ublažavanja viznog režima, moraju iskoristiti priliku koja im se sada pruža.

Sada je vrijeme da se konstruktivno djeluje kako bi se građanima osigurale bolje policijske snage. Komentari o otpočinjanju novih pregovora o reformi policije nisu u skladu s obavezama stranaka iz RS koje su prihvatile politički dogovor i neće unaprijediti interese BiH, odnosno ni na koji način ne doprinose dobrobiti svih građana.

Organi vlasti moraju djelovati u okviru raspoloživih finansijskih sredstava

Jučer je objavljeno da je izvoz iz BiH povećan za 37%, dok je vrijednost uvoza povećana za 3%. Ovo je izuzetno dobra vijest. Ova zemlja postaje finansijski stabilnija. Pored toga, uspješno uvođenje PDV-a dovelo je do prikupljanja novčanih sredstava u milionskim iznosima.

Međutim, MMF je upozorio da bi povećanje troškova, do kojeg je sada došlo u ovom predizbornom periodu, moglo prouzrokovati postizbornu «glavobolju» tokom koje bi organi vlasti morali prekinuti finansiranje nekih programa i usluga zbog nedostatka finansijskih sredstava.

Elementarne ekonomske činjenice ograničavaju organe vlasti, kao i same građane. Trošiti možete samo ono što zaradite. Istovremeno, morate osigurati mudro trošenje sredstava koja ste zaradili.

Jasno je da potrošnja treba biti fokusirana na osiguranje dugoročne koristi za sve građane, a ne na kratkoročno osiguranje glasova. U tom smislu bih istakao novu inicijativu u državnom Parlamentu vezanu za izmjene i dopune paketa zakona o kompenziranju vlasnika stare devizne štednje. Ovim prijedlogom se rok isplate skraćuje na period od pet godina. Međutim, to obećanje se ne može ispuniti. U ekonomskoj situaciji u kojoj se nalazi Bosna i Hercegovina, postojeći paket nudi najbolju moguću naknadu. Izmjenama i dopunama bi se zemlja opteretila milijardama dodatnih potraživanja koja ne bi mogla isplatiti, što svakako ne bi koristilo ni građanima niti vlasnicima stare devizne štednje.